



4

Niining Leksyona Matun-an Mo Kini

Si Jesus Ug Ang Babayeng Samarianhon

Si Jesus Nag-ayo Sa Anak Sa Opisyal

SI JESUS UG ANG BABAYENG SAMARIANHON

(Basaha ang Juan 4:1-42)

Sa nasud ni Jesus gipaka-ubos sa kadaghanan sa mga tawo ang mga Samarianhon apan gihi-gugma ni Jesus ang tanan. Giatiman Niya sa walay pagpili ang datu ang kabus ug ang mga katawhan sa nagkalainlaing nasud.

Ang babayeng Samarianhon lahi kaayo kay kang Nicodemo. Si Nicodemo usa ka maayong tawo apan nagkinahanglan gihapon siyang motoo kang Jesus aron makabaton sa kinabuhing dayon. Apan kining babayhana dili maayo ug dungog. Nasayran ni Jesus nga siya usa ka dautang babaye apan siya luwason ni Jesus. Sama kang Nicodemo mamaluwas lamang siya pinaagi sa pagtoo kang Jesus.

Gipasabot ni Jesus nga makahatag Siya ngadto sa babayeng Samarianhon ug tubig sa kinabuhi. Kini ang iyang gikinahanglan aron pagtagbaw sa iyang giuhaw nga espiritu. Diha sa ebanghelyo ni Juan ang pulong "kinabuhi" gigamit dili mo ubos sa 36 ka higayon. Ug ang 17 niini gigamit uban sa pulong "walay katapusan" o "dayon." Nasayud kita mahitungod kang Jesus nga "diha kaniya ang kinabuhi" (Juan 1: 4) ug nga kadtong misalig kang Jesus gi-anak na pag-usab ug aduna nay kinabuhing dayon (Juan 3:5, 15, 16, 36). Magahatag si Jesus ug tubig sa kinabuhi kaniya nga modawat niini (Juan 4:14.)





Naghisgut ang babayeng Samaritanhon mahitungod sa iyang kaugalingong paagi sa pagsimba. Miingon si Jesus nga ang dapit ug mga paagi sa pagsimba dili mao ang labing mahinungdanong mga butang. Ang mahinungdanon mao ang pagsimba “diha sa espiritu ug sa kamatuoran.”

Ang pagpasakop sa usa ka iglesia ug ang mga paagi o mga tulomanon sa mga relihiyon lamang dili makapahimuot sa Dios. Dili matagbaw ang Dios hangtud nga kini nga pagsimba mahimong matuod ug espirituhanong pagsimba. Ang matuod nga pagsimba nagasunod sa gitudlo sa Biblia. Ang espirituhanong pagsimba kinahanglan nga kinasingkasing gayud ug sumala sa paagi sa Balaang Espiritu.

Nasayran sa babayeng Samaritanhon nga si Jesus dili usa ka kasarangang tawo lamang, tungod kay gisultihan man siya sa tanan niyang gibuhad. Sa dihang gipahibalo siya ni Jesus nga Siya ang Manluluwas sa kalibutan nga gisaad sa Dios, mitoo ang babaye Kaniya. Midagan dayon siya ngadto sa iyang balangay ug gisultihan ang mga katawhan mahitungod kang Jesus. Sa dihang gisuginlan niya sila nga ang Mesias ania sa ilang dapit ang mga katawhan miadto sa atabay aron sa pagpakigkita kang Jesus.

Mipuyo si Jesus ug duha ka adlaw sa ilang dapit aron pagtudlo kanila mahitungod sa kaluwasan. Miingon ang mga katawhan ngadto sa babaye, “kami nagatoo dili na tungod sa imong

mga pulong, kay kami na gayud mao ang nakadungog Kaniya, ug among naila nga Siya sa pagkatinuod mao ang manluluwas sa kalibutan.”

Kinahanglan nga ang matag-usa kanato magasalig kang Jesus ug magaila Kaniya sa atong kaugalingon gayud. Ang mga katawhan nakadungog mahitungod kang Jesus gikan sa mga ngabil sa babaye, apan dili kini igo. Tingali nakabati na ikaw mahitungod kang Jesus gikan sa imong mga ginikanan, sa pastor o sa usa ba ka higala. Apan dili igo nga makabati lang kita mahitungod kang Jesus gikan sa uban o magatuon ba hinoon mahitungod Kaniya. Kinahanglang makaila kita Kaniya sa personal gayud nga paagi diha sa atong mga pag-ampo ug magasalig Kaniya ingon nga atong kaugalingong Manluluwas.

Buhata Kini

1. Sag-uloha ang Juan 4:24
2. Unsa may gisulti sa mga katawhan mahitungod kang Jesus human Niya katudloi sila?
 - . . . a) Siya usa ka maayong tawo nga nagahatag ug tubig sa mga giuhaw nga mga katawhan.
 - . . . b) Siya mao ang Manluluwas sa kalibutan.
 - . . . c) Siya usa ka propeta nga nasayud sa tanan mahitungod sa katawhan
3. Aron nga dawaton ka sa Dios, kinahanglan nga ikaw.
 - . . . a) sa imong kaugalingon gayud mosalig kang Jesus ingon nga imong Manluluwas.
 - . . . b) Matawo gikan sa usa ka Cristohanon nga mga ginikanan.
 - . . . c) Maminaw sa pastor ug sa usa ka higala mahitungod kang Jesus.

SI JESUS NAG-AYO SA ANAK SA OPISYAL (Basaha ang Juan 4:43-54)

Nakahangyo na ba ikaw kang Jesus nga Iyang ayohon ang usa ka higala mong nagmasakiton? Usa ka opisyal naghangyo kang Jesus sa pag-ayo sa iyang anak nga lalake. Wala moadto si Jesus sa bata. Gisultihan lang ni Jesus ang amahan nga ang bata mamaayo, ug ang amahan mitoo sa Iyang mga pulong. Usa ka maanindot nga butang ang pagkasayud nga si Jesus nagabaton pa giha-pon sa gahum nga diha Kaniya sukad pa kaniadto. Mahimong mamaayo kita sa atong balatian pina-agi lang sa pag-ampo ug sa pagsalig sa mga pulong ni Jesus.

Buhata Kini

4. Giunsa man ni Jesus sa pag-ayo ang anak sa opisyal sa kagamhanan ?
 - . . . a) Nagpadala Siya ug medisina.
 - . . . b) Nagdiwata Siya
 - . . . c) Miingon Siya nga ang bata mama-ayo ug mitoo ang amahan.
5. Itandi ang imong mga tubag sa hustong mga tubag nga anaa sa katapusan niining leksyona.
6. Sulati ang imong Rekord sa Estudyante alang sa ika-4 nga leksyon.

Mga Tubag sa Ika-4 nga Leksyon

Kon ang imong hustong mga tubag 3 ka buok, markahi ang imong grado ug labing maayo; kon duha lang, sulatj ug maayo. Kon kubos sa duha ang imong hustong mga tubag, basaha pag-usab ang leksyon.

2. b) Siya mao ang Manluluwas sa kalibutan.
3. a) sa imong kaugalingon gayud mosalig kang Jesus ingon nga imong Manluluwas.
4. c) Miingon Siya nga ang bata mamaayo ug mitoo ang amahan.

Gidaghanon sa hustong mga tubag _____

Grado _____